

# PLEIV TUJETSCH



**Rapport annual 2005**

# INVITAZIUN

**alla radunonza dalla pleiv Tujetsch  
gliendisdis, ils 12 da zereladur 2006  
ella aula dalla casa da scola Sedrun**

## **Tractandas**

Avertura e beinvegni

1. Elecziun da dus dumbravuschs
2. Protocol dalla radunonza generala dils 6 da zercladur 2005
3. Rapport dil president dalla pleiv
4. Rapport dalla presidenta dil Cussegl pastoral
5. Rendaquen, rapport dils revisurs ed approbaziun dil quen 2005
6. Preventiv e fixar il pei da taglia per igl onn 2006
7. Approbaziun d'ils contracts d'acquist da terren en connex cun la via da quartier Ruinas a Selva
8. Orientaziuns
9. Varia

*Alla fin dalla radunonza muossa Bruno Berther 2 films sur dallas occurrenzas pigl onn giubilar 800 onns baselgia s. Vigeli, numnadamein la fiasta da s. Vigeli e la «processiun» sil Gotthard. La documentaziun cuozza zirca 30 minutas.*

Preziadas commembras e preziai commembers da nossa pleiv, Vus essas cordialmein envidai alla radunonza generala da Vossa pleiv. Ei fa a nus grond plascher da beneventar in numerus diember da commembers.

En num dalla suprastonza da pleiv Tujetsch

Il president:  
Tadeus Giossi

La vicepresidente:  
Ursulina Cavegn-Bisquolm

# Protocol

## **Radunonza generala dalla Pleiv da Tujetsch, gliendisdis ils 06-06-2005 allas 20.15 uras en sala da scola Rueras**

### **Presents**

26 personas

### **Perstgisai**

Rebecca Loretz-Berther

### **Tractandas**

Avertura e beinvegni

1. Elecziun da dus dumbravuschs
2. Protocol dalla radunonza extraordinaria dils 5 d'avrel 2004
3. Protocol dalla radunonza generala dils 14 da zercladur 2004
4. Protocol dalla radunonza extraordinaria dils 21 da december 2004
5. Rapport dil president dalla pleiv
6. Rapport dalla presidenta dil Cussegl pastoral
7. Rendaquen, rapport dils revisurs ed approbaziun dil quen 2004
8. Preventiv e fixar il pei da taglia per igl onn 2005
9. Elecziun dil Cussegl pastoral
10. Contract da vendita e contract da concessiun en dretg da baghegiar cun dretg da cumpra cun la vischnaunca:
  - a) Vendita parcella prau «Dulezi» (nr. 1203 e 1248m<sup>2</sup> dalla parcella 2707)
  - b) Contract da concessiun en dretg da baghegiar dil rest dalla parcella 2707 cun dretg da cumpra
11. Orientaziuns
12. Varia

Nies president dalla pleiv Tadeus Giossi arva la radunonza e fa in cordial beinvegni a tuts presents. En special beneventa el Sur Alexi Manetsch, il president communal Placi Berther sco era il niev elegiu president communal Pancrazi Berther.

### **1. Elecziun d'in dumbravuschs**

Sco dumbravuschs vegn elegiu signur Emanuel Berther.

## **2. Protocol dalla radunonza extraordinaria dils 5 d'avrel 2004**

Il protocol dalla radunonza extraordinaria dils 5 d'avrel 2004 vegn approbaus unanimamein.

## **3. Protocol dalla radunonza generala dils 14 da zercladur 2004**

Il protocol dalla radunonza generala dils 14 da zercladur 2004 vegn approbaus senza objecziuns.

## **4. Protocol dalla radunonza extraordinaria dils 21 da december 2004**

Il protocol dalla radunonza extraordinaria dils 21 da december 2004 vegn approbaus unanimamein.

## **5. Rapport dil president dalla pleiv**

Rapport dalla suprastonza dalla pleiv Tujetsch per igl onn 2004

Preziadas parochianas, preziai parochians

Igl onn vargau ei staus per la suprastonza da pleiv in onn da preparativas. Dad ina vart tuttas preparativas per la renovaziun dalla baselgia parochiala s. Vigeli e lu era las preparativas per la fiasta da giubileum 800 onns baselgia s. Vigeli. Per la renovaziun e restauraziun ha la cumissiun preparatorica fatg la gronda lavur e preparau per ch'ei sappi vegnir entschiet cun l'entschatta digl onn 2005 cun las lavurs da renovaziun. Dalla cumissiun essan nus vegni informai da temps en temps e leu nua ch'ei ha duvrau ha la suprastonza priu las decisiuns necessarias. Tut quei ch'ei stau pusseivel havein nus denton delegau alla cumissiun. Aschia ha quella saviu luvrar speditiv ed independent.

### **Renovaziun baselaia s. Vigeli**

Ils 12 da schaner 2004 ha la suprastonza da pleiv ensemen cun la cumissiun giu ina seduta cun la suprastonza communal. Cheu havein nus presentau il project da sanaziun dalla baselgia parochiala. Nus havein sespruau da dar investa dil previu cun presentar ils cuosts approximativs ed era in plan da finanziaziun. Medemamein ei vegniu relatau sur dallas davosas restauraziuns pli grondas e la muntada culturhistorica dalla baselgia per nossa val. Cun il scriver dils 21 da schaner 2004 communichescha la suprastonza communal ch'ella seigi, en sia seduta, sefatschentada da principi cul project presentau. Muort la grondezia dil previu e la vasta documentaziun vegni la suprastonza ad examinar differenziadamein avon che saver prender posiziun sin nossa damonda davart in

sustegn finanziel per la restauraziun previda dalla baselgia da s. Vigeli. Per quellas preparativas basegni ei denton empau dapli temps.

La suprastanza da pleiv ha ils 29 da mars 2004 envidau ad ina sera d'informaziun e discussiun ella baselgia s. Vigeli. In tschuppel interessai han priu part a quella sera d'informaziun. Cheu ei vegniu informau detagliadamein sur dalla necessitad d'ina renovaziun dil sanctuari s. Vigeli. La miraglia ei nera e per part da gronda humiditad. Egl arviul ei serimmu bia miarda, quei per la gronda part entras il scaldament. Ils maletgs ein stgirs e macorts, las colurs fuostgas e senza veta. Plinavon ei vegniu orientau sur dallas davosas renovaziuns, nua ch'igl ei vegniu per part fatg grondas ed impurontas midadas el sanctuari. Buca tuttas ein stadas gartegiadas ed ins sto tschentar la damonda daco e pertgei aschia. Per exempel la serrada dalla finiastra encunter ost, la color cotschna dils altars eav. Dar risposta sin quellas damondas negin che sa pli. La tgira da monuments e la savida en quels graus eran da gliez temps buca da gronda impurtonza. Aschia ei igl intent dalla baselgia vegnius adattaus pli baul senza prender pli grond risguard sin ils aspects stilistics.

Ils 5 d'avrel 2004 ha giu liug la radunonza extraordinaria per prender la decisiun per la realisaziun dalla renovaziun dalla baselgia s. Vigeli. In grond diember ha priu part a quella radunonza nua ch'igl ei danovamein vegniu presentau il project da renovaziun. La discussiun ha mussau ch'il pievel vesa la necessitad da far empau remadura, denton la restauraziun dils altars el stan d'origin ei buca propi capeivla. Mettan ins anavos ils altars el stan d'origin, vegn ina color plitost sil mellen a dominar. Quella color simbolisescha il tschiel ed il parvis e dat tut in'otra tempra a nossa baselgia. Cun aunc arver la finiastra davos igl altar grond, ch'ei drizzada encunter damaun, dat il sulegl in effect tut special en baselgia. Il sulegl dalla damaun ei il simbol dalla levada da Cristus. Ils cuosts per quella renovaziun ed il deivet restont ein ualti aults e dattan da studegiar e da ponderar. Prender en mira ina eventuala redimensiun digl entir project, fuss ina varianta da cumpromiss. La radunonza decida la finfinala da purtar en in'ulteriura radunonza variantas redimensiunadas.

Alla radunonza generala dils 14 da zercladur 2004 porta la suprastanza dalla pleiv danovamein la tractanda restauraziun e renovaziun baselgia s. Vigeli. Cun ina documentaziun dalla cumissiun da baghegiar vegn orientau danovamein la necessitad ed il basegn d'ina miglier vid la baselgia parochiala. Suandontas mesiras ein planisadas:

- Suentar ils mirs vegn fresiau ora ina fessa d'ariaziun che vegn emplenida cun in letg da crappa.

- Las miraglias donnegiadas, ed oravontut l'isolaziun da core vegn allontanada e remplazzada cun maulta e caltschina.
- Las finiastras da metal vegnan remplazzadas cun talas da rom da lenn. Plinavon vegn la finiastra ella nav danovamein aviarta.
- Las installaziuns electricas vegnan remplazzadas totalmein, naturalmein era il scaldament, ils aultplidaders ed in niev indrez per impedi d'udida.
- Il plantschiu da ruver vegn remplazzaus cun in da stgein ed ils bauns vegnan bugadai.
- Tuttas preits ed igl arviul cun stuccaturas vegnan schubergiadas da schetg e silsunter cuvretgas cun ina colur da caltschina cun poras aviartas.
- Ils tschun altars vegnan schubergiai e conservai. Ils altars barocs vegnan restaurai al stan original.
- L'entira part davos, lautga cun plantschiu sutsi e petgas, vegnan adattadas al maletg baroc dalla baselgia. Era l'orgla retscheiva ina colur adattada al stil baroc.
- L'automatisaziun da tucchar e l'ura baselgia vegnan suttamessas ad ina renovaziun.

Ilis cuosts totals muntan per quellas mesiras da renovaziun e restauraziun frs. 1'397'940.00, quei che fuss era la varianta optimala. La varianta 2 prevedess da reducir ilis cuosts per rodund frs. 250'000.00 cun strihar il remplazzament dallas finiastras, il crap natural, il plantschiu e redimensiunar il sistem da scaldament. Ella varianta 3 ei previu ultra da quella reducziun da mo schubergiar ilis altars enstagl da tschaffar els all'originalitad. Cun quella varianta custass la restauraziun aunc rodund 823'000.00 francs. Tuttas reducziuns dalla varianta optimala muntan denton concessiuns per part era cun consequenzas. Baul ni tard sto era il buc exequiu vegnir sanau.

La cumissiun ensemen cun la suprastonza ei era sefatschentada cun la finanziaziun. Tier la varianta optimala resta ei aunc in deivet, suenter haver risguardau las contribuziuns ch'ei in entochen uss stadas d'eruir, da rodund frs. 597'000.00. Tier varianta 2 sesminuescha il deivet per rodund 100'000.00 francs e tier varianta 3 per circa 50'000.00 francs. Tier tuttas treis variantas sforza il deivet restont d'anflar ulteriuras entradas. Buc il davos ei da preveder la vendita d'ina casa pervenda.

La baselgia parochiala da s. Vigeli ei la pli gronda baselgia dil baroc ault dil Cantun Grischun, mo la baselgia dalla claustra da Mustér ei pli gronda. Il pli custeivel dalla baselgia ein ilis altars cun las decoraziuns ed entagls multifars, sias statuas e ses ornamentals. Las ovras da Gion e Jodok Ritz ein objects extraordinars custeivels e prezius. La picturia originala ei semantenida fetg bein sut la cuvrida dils anno 1934/35. Ilis altars san vegnir restaurai e puspei presentai el stan original. La cumissiun e la suprastonza da pleiv proponan la restauraziun e renovaziun optimala. Quella varianta risguarda tuts

basegns actualmein necessaris e restaurescha ils altars anavos en siu stan original, plinavon vegn la part davos dalla baselgia adattada al maletg baroc.

## 800 onns baselgia s. Vigeli

Igl onn 2005 sa la baselgia da s. Vigeli festivar il giubileum da 800 onns dapi l'emprema menziun. Era cheu ha ei duvrau preparativas ed organisaziun per saver festivar igl onn giubilar. La suprastonza ensemen cun igl archivar Tarcisi Hendry han elaborau in program da fiasta. Alla radunonza extraordinaria dils 21 da december 2004 havein nus presentau a Vus il program da giubileum. Quel preveda differentas occurrenzas per il pievel duront igl onn ora. Il scribe Norbert Berther, Cuera/Sedrun, publichescha regularmein ella Tuatschina davart la veta sacrala a s. Vigeli. Plinavon ei previu suenter la restauraziun da crear in guid per la baselgia parochiala sco era prender en vesta ina nova edizium «Baselgias e capluttas da Tujetsch» cun actualisar.

Las occurrenzas previdas ein:

1. Da Daniev 2005, avertura digl onn da giubileum, plaid d'avertura en baselgia cun la presentaziun dil program. Sitg da Daniev e repartiziun dil program.  
Ils 20 d'avrel 2005 referat cun avat Daniel Schönbächler, Mustér cul tema «Tgei ei oz aunc spiritualitad».
2. Restauraziun dalla baselgia - di dallas portas aviartas cun explicaziuns dils responsabls.
3. Fiasta da s. Vigeli, patrun baselgia, ils 26 da zercladur 2005. Messa festiva en sala da gimnastica cun gentar da cuminonza per tuts parochians, offerius dalla pleiv. Purschida culturala d'uniuns indigenas. Ingress festiv en fuorma da processium neu dil vitg da Sedrun e da Rueras anora.
4. Processium sil Gotthard - spassegiada en regurdientscha dalla anteriura processium. Accumpignament da personas che declaran historia, fauna e flora.
5. Concert da stad - concert per la giuventetgna cun las Liricas e Clean, ils 2 da fenadur 2005 en sala da scola a Sedrun, cun patratgs religios en fuorma d'ina devoziun.
6. Notg da film ils 5 d'uost 2005 - films che muossan ni presentan occurrenzas religiosas.
7. Workshop per ils affons ils 16 da settember 2005 - luvratoris entras personas qualificadas e differentas purschidas adattadas als scalems. Gentar communabel.
8. Ils 2 d'october 2005 - fiasta dil s. Russari. Fiasta da cuminonza culs vischins da Mustér, Medel, Andermatt ed Olivone - treis lungatgs s'entaupan. Messa festiva en claustra a Mustér, silsuenter processium viers la halla plurivalenta. Purschida culturala dalla uniuns vischinontas - gentar communabel en halla.

9. Concert giubilar ils 25 da december 2005 cul Chor baselgia e Cantus firmus.
10. Occurrenza finala da Silvester - terminaziun digl onn giubilar. Devoziun en baselgia cun cant e gloria. Silsunter puschegn da Silvester/Daniev.

La suprapostonza dalla pleiv ei pertscharta che l'organisaziun da tuttas occurrenzas pretendia bia engaschi ed ei in grond buordi. Ella ei denton satisfatga da saver porscher a parochianas e parochians in vast program per igl onn da giubileum. Ils cuosts approximativs per tuttas occurrenzas ein vegni calculai cun rodund 60'000.00 francs. Legreivla-mein separticipescha la vischnaunca politica cun frs. 15'000.00 vid ils cuosts.

### **Regulativ d'indemnisaziun per survetsch da baselgia per las pleivs da Medel, Mustér e Tujetsch**

Quest regulativ normescha l'indemnisaziun per il survetsch da baselgia dallas treis pleivs. Da principi vegnan tuts survetschs da baselgia dallas treis pleivs exequi entras ils pleivons engaschai, dapresent: sur Alexi Manetsch, sur Ozioma Nwachukwu, sur Albert Wangler e sur Benni Varghese. Ei ha denton semussau el davos temps che quels pleivons san buca exequir enqual survetsch. Ensemen culs secretariats vegn il plan pils survetschs da baselgia fixaus entras il plevon responsabel. Semuossa il cass ch'igl ei buca pusseivel d'exequir in survetsch, sa suenter consultaziun e sclariment entras il plevon responsabel, vegnir engaschau in plevon gidonter. Per quellas lavurs vegn il plevon gidonter indemnisaus sco previu el regulativ. Persunas che han specials giavischs per in survetsch da baselgia (sco per exempel spiritual preferiu) han da pagar las indemnisaziuns sco previu per ils pleivons gidonters. Plinavon ei vegniu reglau per persunas che pagan buca taglia en nossas pleivs, (excepiu persunas ch'ei naschidas e carschidas si ellas pleivs) che vulan denton far diever d'in survetsch da baselgia da nossas pleivs, sco per exempel battens, nozzas, sepulturas. Per quels survetschs incasseschan las pleivs ina summa commensurada che va dabien al spiritual, caluster, ordinatur, ministrants e per il diever balla baselgia ni caplutta. Ils ugaus baselgia, respectiv ils calusters incasseschan l'indemnisaziun ed ein responsabels per la repartiziun als pertuccai. Per persunas extras dalla baselgia e per las qualas la parentella giavischa ina sepultura, tschenta la pleiv pertuccada in quen da 700.00 francs che vegn repartius (frs. 150.00 per spiritual, frs. 400.00 per diever dalla baselgia, frs. 50.00 per caluster, frs. 50.00 per ordinatur, frs. 30.00 per ruseris, frs. 20.00 per ministrants). Per las messas commemorativas senza publicaziuns vegn incassau il stipendi da frs. 10.00 e per messas commemorativas cun publicaziuns frs. 20.00. Quei regulativ ei vegnius mess en vigur cun igl 1. da schaner 2005.



## Creisma

Ils 25 d'avrel 2004 havein nus festivau la s. Creisma. Las annadas 1991/92/93 ein vegnidas cresmadas. Igl anteriur avat, Pancraz Winiker da Mustér, ha festivau cun nus quella fiasta e cresmau ils affons.

*«Neu nies scaffider car sogn Spert,  
nus dai las grazias, dai contiert.  
Viseta nus o dun de Diu,  
nos cors che ti has tez scaffiu.*

*Il consolader eis numnaus,  
in dun dal Bab nus regalaus.  
Fontauna viva, fiug, amur,  
dil Bab perpetna tarlischur.*

*Els cors o fai ch'ei vegni dis  
cun la carezia dil parvis.  
Conforta nossa fleivladad,  
dai a nus tuts la sanadad.*

*Nos inimitgs fugenta bein,  
nus dai la pasch cumpleinamein.  
Nies bien mussader va avon,  
la sontga via nus mussond».*

Sperond ch'il Sogn Spert sclareschi ed empeilli ils affons sin lur via, giavischein nus ad els tut bien.

Il Segner ha dau - il Segner ha priu - siu num seigi benedius

En nossas baselgias e capluttas ein enteifer igl onn 10 affons vegni battegiat. Da nossa pleiv eis ei stau 4 affons che han retschert ils s. Sacrament dil batten. Ad affons e geniturs giavischein nus bia legria ed in bien prosperar en nossa cuminonza cristiana. Lètgs ein uonn 2 vegnidas enzinnadas en nossa pleiv. Als spusai cordiala gratulaziun e tut bien en la veta matrimoniala.

*«Mira viers tschiel, si egl ault tiel Signur - sentas siu maun che Tei meina...»*

Uonn ha il Segner menau a casa tier il Bab 13 da nos commembers. Per els ei il viadi terrester ius a fin e la porta dil parvis ei seviarta. Els ein entrai avon la fatscha da Diu e gaudan ussa la beadadad dil tschiel. Per nus laian els anavos ina gronda largia, ils fastitgs dad els ein denton aunc adina presents. Perquei lein nus esser engrazieivels che nus havein astgau haver els, ch'els ein stai cheu tier nus ed han enrihiu nossa cuminonza. Il Segner regali ad els la pagaglia perpetna. Els ruaussien en pasch.

### **Midadas tier il personal**

Dapi 2 onns ei sur Albert Wangler engaschaus en las treis pleivs sco augsegner gidonter. Nus enconuschein el sco plevon aviart, denton era empau provocativs. Ses priedis han meinsvart dau da patertgar ed era discussiunar. Igl ei aunc mai vegniu discussiunau ton sur dalla baselgia en general e sur dil priedi sco duront igl engaschament da sur Wangler. Ses patratgs e sia demananza han buca plaschiu a tuts. Beinenqualin ei buca staus da siu meini ed ei ha perquei era muncau capientscha e toleranza da nossa vart. Il proverbium tudestg di denton: «Allen recht getan, ist eine Sache, die niemand kann» - pia far endretg a tuts ei negin che sa. Igl ei denton iu aschi lunsch che brevs e telefonats han anflau la via entochen tier igl uestgiu. E la finfinala ha igl ordinariat episcopal da Cuera buca elegiu pli sur Wangler sco plevon gidonter per nossas treis pleivs. Aschia ha il contract denter las pleivs e sur Wangler stuiu vegnir sliquiaus si sin la fin da mars 2005. La suprastonza dalla pleiv da Tujetsch engrazia ad el grondamein per la buna lavur ed engaschi en favur da nossa cuminonza. Tier bein enqualin da nus vegn el a restar en buna ed engrazieivla memoria. Nus giavischein ad el sin siu viadi terrester bia bien e ch'el entaupi biars carstgauns che carezan ed apprezzieschan el. Possien cletg, buna sanadad e la cuntentientscha accumpignar el.

Cun l'entschatta da december 2004 havein nus saviu engaschar sur Benny Varghese, naschius ils 16 da matg 1968 a Kerala/India. El ei vegnius engaschaus sco plevon gidonter per las 3 pleivs en pensum cumplein. Entochen ch'el ei sevivius en, eis el secasaus a Mustér tier sur Alexi Manetsch. Aschigleiti ch'el drova buca pli agid vegn el a prender dimora en casa pervenda a Sedrun. Nus sperein bugen che nus haveien anflau cun sur Benny Varghese in plevon che vegn acceptaus e purtaus dil pievel. Ad el fagein nus in cordial beinvegni cheu tier nus e nus sperein bugen ch'el anfli tier nus in cauld dacasa.

### **Engraziament**

Alla fin da nies rapport vulein nus engraziar a Vos preziadas parochianas e parochians per Vies sustegn e Vossa sensibilitad en favur dils basegns da nossa pleiv. Cun Vies agid

e sustegn gideis Vus nus ad ademplir l'incumbensa surdada a nus. Segiramein va ei buc adina sco mintgin giavischa, denton sespruein nus da far tut il pusseivel per in bien prosperar en nossa cuminonza. Il bien prosperar en ina cuminonza dependa allura era digl engaschament da mintga commember. Ei nezegia nuot d'haver plevons en nossa pleiv che fan dumengia per dumengia messa, mo ils commembers muossan negin interess. Buca mo la giuventetgna maunca en las baselgias, igl entir pievel ei buca presents. Nus lein engraziar a Diu che nus havein aunc augsegners che celebreschan las s. messas, era sche mo paucs teidlan il plaid da Diu. Ha Dieus veramein da dir nuot pli a nus?

Cordial engraziament admettein nus als augsegners, sur Alexi Manetsch, sur Ozioma Nwachukwu, sur Albert Wangler e sur Benny Varghese per tut lur buna lavur. Era als spirituals che segidan cun els en lur grond uffeci, in sincer Dieus paghi. Vegli Dieus era gidar els ad ademplir l'incumbensa d'annunziar igl evangeli da Niessegner Jesus Cristus. Dieus paghi era als spirituals dalla casa s. Vigeli, sur Placi Huonder, sur Christian Monn e sur Giusep Berther per lur buns survetschs.

Plinavon lein nus engraziar;

- als responsabels dalla ductrina per nos affons, allas dunnas per il salid dil Segner
- allas calustras e calusters cun lur gidonters, als ugai da baselgias e capluttas
- als organists, al secretariat, al cussegl pastoral, allas differentas uniuns ed als ministrants
- alla cumissiun ed ils architects dalla restauraziun baselgia s. Vigeli
- a Vus ch'essas forsa vegni emblidai
- ed a Vus tuts che ureis e canteis en honor dil Tutpussent.

Vegli era Dieus il Signur sur veta e mort remunerar Vus tuts per Vies engaschi en favur da sia vegna. Ils suandonts plaids d'ina canzun duein gidar nus a mirar si enviars il tschiel.

*«Tutpussent altissim Diu, Tei ludein cun vusch cumina  
Avon Tei ch'has tut scaffiu, gl'univers entir s'enclina.*

*Its avdents dil sogn parvis, Tei aduran en perpeten  
Senza mai vegnir unfis, senclinond von tei repetan  
Ti eis il grond signur, Ti meretas tutt'honor».*

## **6. Rapport dalla presidenta dil Cussegl pastoral**

Rapport annual 2004 dil Cussegl pastoral Tujetsch

Preziadas parochianas e prezias parochians

In onn d'uffeci sauda puspei al vargau, cun in cuort rapport lessel dar a Vus plaid e fatg sur dil curriu e passau en nies cussegl.

### **Program da lavur**

- Sogns retgs
- Di da suppa
- Aperitivs Rueras e Sedrun
- Segidar da Rogaziun Federala
- Punsch per sentupada dalla giuventetgna
- Segidar culla vestgadira da Sontgaclau

### **Sogns retas**

La canzun dil pign schumbrader ch'il scolast Beni Hendry ha mussau als affons ei stada bellezza. El ei adina buns per bialas surpresas, ed era ils affons ein stai loschs d'astgar cantar enzatgei niev. Biars geniturs ein puspei stai a disposiziun per transports e tscheinias, per la sminca astgein adina clamar la dunna Astrid Monn.

### **Di da suppa**

Sch'ins drova per fiastas che vegnan fatgas el liber bial'aura, ston ins magari dir ch'ella seigi dada ell'aua. Tier il di da suppa san ins dir ch'el seigi daus el sulegl. Paucas dumengias digl unviern 2004 ein stadas aschi bialas sco la dumengia dil di da suppa. La buna suppa da nies premurau cuschinier Nazi Schmid havess aunc tunschiu inagada per tonta glieud.

### **Aperitivs**

Sco gia in per onns usitau offerescha la Pleiv da Tujetsch aperitivs da perdanonza a Rueras e Sedrun. Star suenter messa ni processium in mument ensemen, s'entupar e dar ina paterlada cun fatschas ch'ins vesa buca mintgadi vegn apprezziau da biars.

### **Rogaziun Federala**

Da Rogaziun Federala engraziein a Diu per la buna raccolta, raccoltada in onn ora. Quei survetsch divin han il catechet Venzin Hubert e sur Ozioma capiu da preparar cun plaid e musica. Las baselgias han nossas calustras ornau cun bien maun e gust. Ch'ellas han plascher da lur lavur sentin e vesein nus da quellas occurrenzias tut aparti.

## Sontgaclau

Dapi la davosa missiun saudan ils vestgius da Sontgaclau e sia suite alla pleiv. Aschia ina lavur supplementara per nosa calustra. Sch'ella sto schubergiar e cuntscar quels ei quei ina horenta lavur. Perquei stattan adina in per femnas dil Cussegl pastoral a disposiziun per segidar.

## Sentupada dalla giuventetgna

Entschatta december ha sur Ozioma celebrau ina messa da giuventetgna. Silsunter spassegiada cun tizuns naven da Sedrun a Dieni cun differents posts da meditaziun, nua ch'ei ardeva adina in fiug. Per quei suentermiezdi ha el giavischau che nus organiseien 10 - 12 liters punsch sco finiziun dalla spassegiada a Dieni. La messa ei stada frequentada pulit, mo enta Dieni han mo 3 giuvnas e sur Ozioma stuiu beiber ils 12 liters punsch! «Es war trotzdem schön und andächtig!» ein stai ils plaids da sur Ozioma.

Tenor nos statuts sut artechel 2 pensums stat denter auter:

- *Accompignament dils ministrants/* cun giavisch da sur Ozioma havein empruau, giu pauc sustegn dils pertuccai. Tgei lu?
- *Pastoraziun dalla giuventetgna durent e suenter ils onns da scola, scolaziun religiuisa, promover e sustener iniziativas dalla giuventetgna/* tgi ei pli cumpetents che sur Ozioma per quellas lavurs. Cun tgierp ed olma empruva el sin tuttas modas da motivar giuventetgna. Sia savida e sias ideas han cheu negins cunfins. Mo!!!
- *Liturgia, formar il survetsch divin, devoziuns, celebrar ils sacraments/* cheu havein nus ina fetg engaschada gruppa liturgica. Engrazia!
- *Scolaziun dils carschi, scolaziun e formaziun religiuisa profundaziun/* sin in inserat ella Tuatschina igl onn 2003 ei 1 perunsa s'intressada???
- *Scadinas lavurs che vegnan exequidas dallas uniuns dueien restar vinavon ad ellas/* nosa uniu da dunnas Tujetsch fa in bien ton da quellas lavurs. Quellas dunnas s'engaschan cun bia carezia e capientscha per giuven e vegl. Compliment ed engraziament!

Pia vid bunas ideas e meinis manca ei buca, denton manca il sustegn e la capientscha per enzatgei niev. Sch'ei dat neginas midadas ei la caussa lungurusa, il cuntrari seigi sesplanghegem e segloriem. Ussa schei mo, co lein tschappar las hottas e far il meglier ordlunder?

## Engraziament

Biara glied tuatschina sengascha cun plascher e perschuasiun per il beinstar da nossa pleiv. Senza igl agid dils parochians(as) havessen nus buca sempel da contonscher nies pensum.

In cordial engraziament sauda segir en emprema lingua a nos premurai spirituals sur Alexi, sur Ozioma e sur Wangler. Senza schar pender la bratscha lavuran els per il beinstar da nossa pleiv. Alla gruppia liturgica ed allas mummas dil survetsch divin preeucaristic medemamein in sincer Dieus paghi. Bugen engraziel era alla suprastonza da pleiv cun il president Tadeus Giossi. In meritau engraziament a nossas premuradas e nunstuncienteivlas calustras e caluster, als chors e lur dirigents, als organists, a tuttas autras uniuns e semplamein a mintgin che segida per il beinstar da nossa pleiv. Cunzun lessel engraziar a mes collegas dil Cussegl pastoral che sustegnan mei cun plaid e fatg.

Sedrun, avrel 2005

Per il cussegl pastoral, Rebecca Loretz

## 7. Rendaquen, rapport dils revisurs ed approbaziun dil quen 2004

### a) Rendaquen

Sco usitau rapportescha il cassier Simeon Cavegn detagliadamein sur dil curriu e passau digl onn vargau 2004. Plinavon ha el era partiu ora in exemplar dil quen a mintga present, aschia ch'el sa serestrenscher sin las cefras las pli impurtontas e principalas. Suen-ter haver fatg las suandontas cudischaziuns/expensas extraordinarias muossa il quen aunc ora in gudogn da frs. \*8'319.80.

50'000.00	mess anavos per renovaziun dalla baselgia s. Vigeli
14'000.00	ulivaziun manco e contribuziun caplutta s.Onna
12'000.00	dito baselgia s. Giachen
20'000.00	mess anavos per festividat 800 onns s. Vigeli
13'700.00	deducziuns ordinarias

Plinavon ei la casa pervenda a Rueras vegnida renovada (nova cuschina) per rodund 40'000. francs.

Las intradas totalas muntan a frs. \*478'253.95.

Las expensas totalas muntan frs. \*469'934.15.

La summa da bilanza:	activas	1'157'542.35
	passivas	242'925.90
	capital agen	914'616.45

Sco finiziun engrazia il cassier a tuts/as convischins/as per las contribuziuns ed il sustegn durent igl onn ora, als collegas da supastanza per la buna collaboraziun ed igl agid retschiert.

### **b) rapport dils revisurs**

La revisiun dil quen 2004 ei vegnida fatga entras ils 2 revisurs Hubert Venzin e Linus Vincenz en preschientscha dil cassier sonda, ils 2 d'avrel 2005. Tier noscha controlla havein inspectau quen e bilanza sco era ils quens dallas baselgias e capluttas. Sco usitau ei il quen menaus conform alla contabilitad moderna schuber e bein. Tut ils mussaments ein avon maun e corrispundan allas cudischaziuns. Tier tut nossas damondas ha il cassier saviu porscher il sclariment giavischau.

Sin fundament da noscha controlla proponin nus alla radunonza generala:

- a. d'approbar il quen e bilanza 2004 dalla Pleiv da Tujetsch
  - b. da dar scarica a cassier ed a tuts funcziunaris dalla suprastanza
  - c. d'admetter al cassier Simeon Cavegn in cordial Dieu paghi per siu grond engaschi.
- Il quen e la bilanza 2004 vegnan approvai unanimamein.

## **8. Preventiv e fixar il pei da taglia per igl onn 2005**

Il preventiv vegn presentaus entras nies cassier Simeon Cavegn ed approbaus sco mess avon. La proposta dalla suprastanza da schar il pei da taglia sin 10% dalla taglia cantunala sco tochen ussa vegn sustenida da tuts presents.

## **9. Elecziun dil Cussegl pastoral**

Il cussegl pastoral ei cheu per esser il piogn denter plevon e pleiv. El secumpona ord 12 commembras ni commembers, cumpriu ils augsegners. Abdicau han: Rebecca Loretz-Berther, Daniela Cavegn-Monn, Claudia Berther-Monn

La presidenta ha dau breigia d'anflar successurs ni successuras, mo anflau ha ella mo 2 persunas enstagl 3 persunas numnadamein:

Arthur Cavegn - Curschellas, Rueras

Arthur Caduff- Deplazes, Sedrun

Ord il miez vegn: Maria Barla Riedi - Berther

Ils novs ed ils vegls commembers vegnan elegi e reelegi unanimamein.

Il Cussegl pastoral secumpona da niev:

Sur Alexi Manetsch

Sur Ozioma Nwachukwu

Sur Benny Varghese

Ursulina Cavegn-Bisquolm, Camischolas  
Arthur Cavegn-Curschellas, Rueras  
Arthur Caduff-Deplazes, Sedrun  
Ursula Deplazes-Monn, Sedrun  
Rafaela Hendry, Sedrun  
Imelda Monn-Monn, Rueras  
Marcus Munsch-Vincenz, Sedrun  
Maria Barla Riedi-Berther, Sedrun  
Barla Aghata Schmid-Cavegn, Rueras

## **10. Contract da vendita e contract da concessiun en dretg da baghegiar cun il dretg da cumpra cun la vischnaunca**

- a) Vendita d'ina cumpart dalla parcella «Dulezi»
- b) Contract da concessiun en dretg da baghegiar cun il dretg da cumpra pil rest dalla parcella 2707

Il president dalla pleiv metta avon la fatschenta e declara la situaziun da partenza. Suenter liungas e diras contractivas cun la suprastonza communal seigien ins finalmein aschi lunsch. La parcella «Dulezi» seigi oz possess dalla fundaziun s. Vigeli, denton giavischass la vischnaunca da surprender quella parcella, demai ch'ella ei inzonada en zona per «stabiliments puplics» ed «indrezs puplics» e per la vischnaunca da grond interest e muntada. Oz existan gia differents contracts en dretg da baghegiar denter la pleiv e la vischnaunca, numnadamein:

Contract dils 25.08.1973 per la piazza da ballapei cun ca. 9'000 m<sup>2</sup>, contract dils 29.08.1977 pils parcadis cun ca. 2'574 m<sup>2</sup> e contract dils 18.03.1983 pil schurmetg civil cun ca. 840 m<sup>2</sup>.

Suenter liungas e diras calculaziuns, sco era sin fundament d'in schazetg neutral digl uffeci da schazetg cantunal e buca il pli davos d'in pareri dils presidents dalla dertgira cantunala, Dr. Jan. H. Schmid e dil president dalla baselgia catolica grischuna, lic. iur. Luis Pajarola, che han giudicau quei marcau e fixau igl emprum tscheins per il dretg da baghegiar sin 2½% e sut la resalva ch'igl ordinariat episcopal accepti quels marcaus, ei la pleiv da Tujetsch prompta da conceder alla vischnaunca da Tujetsch il suadont:

### **a) Vendita:**

- |  |               |             |
|--|---------------|-------------|
| - parcadis parcella nr. 1203/ 2'574 m <sup>2</sup>                 | à 100.00 frs. | *257'400.00 |
| - spunda denter parcadis e piazza da ballapei 2'854 m <sup>2</sup> | à 70.00 frs.  | 199'780.00  |



- part par. nr. 2707, schurmetg civil 843 m2	à 100.00 frs.	84'300.00
-spunda schurmetg civil 505 m2	à 70.00 frs.	35'350.00

## b) Conceder en dretg da baghegiar cun il dretg da cumpra

Il rest dalla parcella nra. 2707, incl. piazza da ballapei, denton mo entochen giudem ils plauns sigl ur, senza la cumpart en zona d'agricultura, vegn dada giu en dretg da baghegiar per in tscheins annual da frs.\*23735.55. Enteifer 10 onns ha la vischnaunca il dretg da cumpra da quella cumpart dalla parcella.

Suenter che sgr. Placi Berther, president communal ha era aunc priu il plaid e recumandau als presents da sustener quella fatschenta cun dilucidar en detagl la necessitad per la vischnaunca, vegn decidiu unanimamein da conceder il terren sco sura menziunau, sut la resalva digl accept dil corpus catholicum sco era ch'il cussegl da vischnaunca ed era la radunonza da vischnaunca acceptien quels contracts.

## Orientaziuns

Sur Benny Vargese ei aunc a Mustér tier Sur Alexi. El sto aunc emprender d'enconuscher nos usits e nos lungatgs (tudestg e romontsch). Sur Alexi appelescha da tschintschar cun sur Benny cu ins entaupa el. Sur Wangler habitescha aunc en casa pervenda a Cadruvi e vegn el proxim temps a bardegljar. Il president dalla cumissiun da baghegiar ha da far neginas comunicaziuns. Il president dalla pleiv engrazia alla cumissiun da baghegir per sia buna lavur.

## Varia

Ord il miez vegn dumandau sch'ei vegni installau in aultplidader era oragiudem baselgia e sin santeri? Igl augsegner vegni ad haver in aultplidader fermaus vid il vestgiu, vegn orientau. Persunas privatas ein stadas el camp culs ministrants. Igl ei stau in'emperneivla jamna. Els appeleschan da mantener quei camp. La suprastonza dalla pleiv duess studegiar da forsa financiar quel. Nua van las unfrendas che vegnan pridas si duront ils survetschs divins da bara? Il president orientescha ch'egl avegnir mondien las unfrendas per ils moribunds da Sedrun alla baselgia da Sedrun e per ils moribunds da Rueras miez per la baselgia da Rueras e miez per la baselgia da Sedrun.

Il president engrazia per la emperneivla radunonza e giavischa a tuts in bien retuorn a casa. La radunonza vegn serrada allas 21.50 uras.

Rueras, ils 17-06-2005

Il president: Tadeus Giossi  
L'actuara: Rita Hitz-Schmid

## Rapport dalla suprastonza dalla pleiv Tujetsch pigl onn 2005

Preziadas parochianas, preziai parochians

Suenter in onn da preparaziun per dus gronds eveniments en nossa pleiv, numnadamein la restauraziun interna da nossa baselgia parochiala e las festivitads dad 800 onns baselgia s. Vigeli dapi l'emprema menziun, ha ei giu num da realisar tut il previu. Il provebi di denton, bein preparau ed organisau ei miez luvrau. Quei havein nus saviu constatar adina puspei tier las occurrenz, ed il beinorganisau ha gidau beinsavens da realisar il previu per cumpleina cuntentientscha. Sper quellas duas grondas fiastas ha la suprastonza era giu da liquidar entginas fatschentas che crodan onn per onn en la cuminonza da nossa pleiv. Baghetgs e beins caschunan adina puspei lavur e manteniment. Cun varga 70 luvreras e luvrers drova ei era beinenqual discuors, empau organisaziun ed adattaziun. Il temps semida onn per onn era en nossa cuminonza aschia ch'ei caschuna meinsvart spontanias disposiziuns. Ina pli gronda e stentusa fatschenta ha la suprastonza da pleiv giu cun la vendita ed ils contracts en dretg da baghegiar dil prau Dulezi. Quella fatschenta ei stada fetg hanada ed ha absorbau dabia substanzas entochen la fin digl onn. Cun l'entschatta digl onn 2006 san ils contracts denter la pleiv e la vischnaunca vegni sutta-crets.

### Renovaziun e restauraziun dalla baselgia s. Vigeli

Cun l'entschatta digl onn ei ladinamein vegniu entschiet cun las lavurs da restauraziun. In palancau ha empleniu la nav dall'entira baselgia. Igl ei stau fetg interessant da serender si egl arviul e contemplar ils maletgs e las figuras. Cheu hans ins pil ver saviu seperschuader dalla gronda necessitad dalla renovaziun e restauraziun. Ils maletgs e las stuccaturas neras e tschuffas han dau perdetga dil ner basegns da quella restauraziun. Tier igl altar digl s. Rusari ha ei dau grondas surprisas positivas. Suenter haver giu schubergiau e sgarau naven la miarda e las maultas ch'eran vegnidas messas si, ei vegniu neunavon in altar clar cun bialas stuccaturas enramadas d'in vel brin/tgietschen che tonscha quasi tochen giun plaun. Ins sa strusch capir che quellas grondiusas caussas eran vegnidas surtratgas. Ei la supponer ch'igl altar era da gliez temps en decadenza ed ins ha empruau da restaurar tal cun ils mettels ch'eran da gliez temps actuals ed avon maun. Segiramein vegneva da quei temps buca dau tonta breigia per mantener las caussas preziusas sco quei ch'igl ei oz il cass. Da quei temps deva ei neginas contribuziuns cantunalas e federalas davart la tgira da monuments. L'impurtonza e la savida per da quellas caussas era da gliez temps da pintga muntada. Tonpli eis ei stau ussa il temps da prender neunavon quei ch'ei vegniu avon onns zuppau e cuvretg. Cantun e Confederaziun

sustegnan oz buca mo cun cussegl mobein era finanzialmein il manteniment e la resalva da scazzis sacral e cultural. Dubla raschun da renovar e restaurar il sanctuari parochial cumpleinamein e metter tut il pusseivel el stan d'origin. Nus dalla suprastanza da pleiv essan adina puspei stai spanegiai tgei surpresas che vegnan alla glisch. Aschia havein nus giu da prender era mintgatun decisiuns spontanias sur dad ina caussa ni l'autra. Ei ha legrau nus adina puspei da far viseta sil plaz da lavur e contemplar las lavurs.

### **Giubileum 800 onns baselgia parochiala s. Vigeli 1205 - 2005**

Il 21 da december 2004 ha la radunanza extraordinaria dalla pleiv approbau il program da fiasta 800 onns baselgia s. Vigeli dapi l'emprema menziun e concediu il necessari credit. Suenter la deducziun da frs. 15'000.00 che la vischnaunca politica ha concediu, resta ei per la pleiv la summa da frs. 45'000.00.

#### **1- Avertura da Daniev**

Cun Daniev ha igl onn giubilar priu sia entschatta. En baselgia ei vegniu fatg il plaid d'avertura e presentau e reparti il program. Silsuenter ei vegniu surviu avon baselgia igl usitau sitg da Daniev. Aschia han ins era giu la pussevlatad da giavischar in bien niev onn e dar ina paterlada cun in ni l'auter. Igl interess pil program ei staus grond e la suprastanza dalla pleiv ei stada spanegiada co las previdas occurrenzas vegnan frequentadas. Discussiuns pli grondas ha ei gia dau quei di pervia dalla fiasta dil s. Rusari, ch'ei preveda da festivar a Mustér ensemen cun las vischnauncas vischinontas. Entgins parochians han fatg gia quei di grondas renfatschas che quella fiasta vegni festivada a Mustér. Schegie ch'il program ei staus approbaus dalla radunanza extrordinaria quasi unanimamein ein las represchas stadas ulti massivas ed ei ha gia fatg la biall'entschatta empau sgarschur d'organisar igl entir program previu.

#### **2 - Referat**

Il 20 d'avrel 2005 ha giu liug en l'aula a Sedrun il referat cun il tema «Tgei ei oz spiritualitad». Igl avat dalla claustra da Mustér Daniel Schönbächler ha tenu in interessant e capeivel referat. Rodund 35 personas han priu part a quella purschida. Schegie ch'ils biars dils presents ein sin ina moda ni l'autra involvai els fatgs da nossa cuminanza essan nus stai cuntents cun la participaziun. Suenter il referat ha la pleiv offeriu in aperitiv. Cheu ha ei era dau aunc la pussevlatad da sediscuorer in cun l'auter.

#### **3 - Restauraziun dalla baselgia**

Il 20 d'avrel 2005 ha giu liug en l'aula a Sedrun il referat cun il tema «Tgei ei oz spiritualitad». Igl avat dalla claustra da Mustér Daniel Schönbächler ha tenu in interessant e capeivel referat. Rodund 35 personas han priu part a quella purschida. Schegie ch'ils biars dils presents ein sin ina moda ni l'autra involvai els fatgs da nossa cuminanza essan nus stai cuntents cun la participaziun. Suenter il referat ha la pleiv offeriu in aperitiv. Cheu ha ei era dau aunc la pussevlatad da sediscuorer in cun l'auter.

stauraziun. Per tut ils auters interessai ei vegniu organisau in di dallas portas aviartas. Il representant dalla tgira da monuments dil cantun Grischun, igl architect ed ils comembers dalla cumissiu han orientau sur dallas lavurs, tgei ch'ei gia vegniu fatg e tgei ch'ei aunc da far. In numerus pievel ha schau orientar ed explicar sur dallas lavurs e las surpresas da questa restauraziun ed han gudiu silsuenter igl aperitiv purschius dalla pleiv.

#### **4 - Fiasta da s. Vigeli**

Als 26 da fenadur havein nus festivau la fiasta da nies patrun baselgia s. Vigeli. Allas 10.00 uras ei il pievel cartent serimnaus a Camischolas per l'entschatta dil survetsch divin cun ina cuorta devoziun. La processiu cun musica e parada ei serendida dalla via s. Onna enviers la casa da scola a Sedrun. Il survetsch divin fesitiv en sala da gimnastica ei vegnius celebraus da monsignur avat Daniel Schönbächler dalla claustra da Mustér ensem cun pader Silvio Deragisch e sur Alexi Manetsch. Il chor baselgia da Sedrun ensem cun ils Sunacorns han embelliu il survetsch divin. Suenter messa ha la pleiv offeriu in stupent gentar a tuts presents. Ils chors mischedai da Sedrun e Rueras ed ils Sunatibas han delectau il pievel duront e suenter gentar cun bialas producziuns. Ils afons han giu in program divertent sin il plaz verd dalla scola, nua ch'els han era survegniu da beiber e da magliar. Ils hosps envidai, tuts spirituals da Tujetsch ni che han pastorau en nossa Val, tuttas muniessas indigenas ni che han luvrau en nossa Val ein vegni undrai cun ina candeila da nossa baselgia. Ina gronda raspada da varga 380 persunas han assistiu al survetsch divin e past da fiasta.

#### **5 - Concert da stad per la giuventetgna**

Cun plascher ha la pleiv organisau in concert per nossa giuventetgna. Sonda, ils 2 da fenadur han las Liricas Analas e Clean concertau per tutta giuventetgna da nossa regiun. Silsuenter han ellas fatg disco entochen encunter l'autra damaun. Las gruppas indigenas han carmelau neutier bia giuventetgna che ha saviu sedivertir e guder lur canzuns. Schizun in per pli vegls han priu la caschun ed ein vegni per tedlar il concert dallas duas gruppas. Era pli pigns «fans» eran presents cun lur geniturs duront las producziuns. Igl ei pil ver stau in grondius concert ed ina biala sera che ha dau a nus bia cuntentientscha e satisfacziun. Era sche la notg haveva midau manti ed il sulegl cuchegiava gia entochen che tutta lavur ei stada finida, essan nus serendi cuntents e ventireivels encunter casa.

#### **6 - Notg da film**

Gia dapi in per onns organisescha il forum cultural ina sera da film. Nus havein era priu cheu la caschun da festivar ils 800 onns baselgia s Vigeli cun mussar vegls films dad

occorrenzas religiusas. In grond pievel ei serimnaus avon casa da scola ed ha mirau cun interess ils films vegls. Savens han ins udiu «iè, mira lo el...«ni» tgi sè quai lo?». Biaras da quellas persunas ein buca pli denter nus, mo als biars da nus aunc en buna e biala regurdientscha. Segiramein ha ei fatg bein da veser inagada puspei fatschas enconuschentas ed usits da pli baul.

## 7 - Processiun sil Gotthard

Ils 10 da settember, allas 04.30 ein ils pelegrins da Sedrun semess sin viadi. A s. Onna han els rimnau ils da Camischolas e contuorn ed a Rueras ein els seuni culs pelegrins ch'eran serimnai avon baselgia s. Giachen. Rodund 20 persunas ein semessas da leu allas 5.00 uras sin via viers il Gotthard, accumpignai dils zenns dallas baselgias da s. Vigeli e s. Giachen che han tuccau da stizzar. Sper mintga baselgia e caplutta ei vegniu detg in paternies. Naven dil pass Alpsu ein aunc rodund 50 persunas viagiai entochen ad Ursera. Suenter la devoziun ella biala baselgia d'Ursera havein nus gudiu in stupent gentar. Cun novas forzas essan semess puspei sin via, ils ins cun tren, ils auters a pei entochen a Hospenthal. Naven da leu essan puspei viagiai communablamein dil pass dil Gotthard siadora. Enqualin empau pli plaun auters pli dabot, denton arrivai ein tuts saunamein sil pass. Ella caplutta dil Gotthard ha sur Alexi celebrau la s. messa dalla dumengia e silsuenter havein schau gustar ina stupenta tscheina. La plievgia dalla sonda sera haveva nuota schau suenter entochen la dumengia endamaun. Quei ha denton nuota stermentau ils ins da returnar puspei a pei entochen ad Ursera. Ils auters ein semess sin via encunter casa cun igl auto da posta. Naven d'Ursera han tuts priu la caschun da serender cun il tren a casa. Cuntents e ventireivels da quella biala excursiun en regurdientscha dalla anteriura processiun essan returnai annavos.





## 8 - Di da luvratori per nos affons

Era per nos affons ha la pleiv vului porscher in nunemblideivel di. Differents posts da lavur han dau la pussevlatad a nos affons d'emprender d'enconuscher fetg variontas materias. Mintga classa ha saviu eleger denter plirs luvratoris. En tut ha ei dau 13 luvratoris. Quei di ei vegniu zambergiau, fletrau, malegiau sin seida, produciu piziultas, casha, modellau, saltau, fatg musica, inscenu teater, realisau film ed auter. Ils affons ein s'engaschai a moda exemplarica ed han luvrau e collaborau cun tutta premura els luvratoris elegi. Ils menaders e menadras ed igl entir cerchel scolastic han capiu da porscher als affons fetg variontas e singularas purschidas. Il resun dils affons e digl entir cerchel scolastic ei curdaus ora fetg positivs ed il giubileum 800 onns baselgia s. Vigeli vegn a restar en buna regurdientscha. Il menader dallas scolas da Tujetsch ha engraziaiu en num digl entir cerchel scolastic alla pleiv per quella purschida singulara per nos affons.

## 9 - Fiasta dil s. Rusari

Avon onns seradunava il pievel cartent a Mustér en claustra per tedlar il plaid da Diu. Quei ei era stau per nus la raschun da festivar a Mustér, ensemen culs vischins dallas

vischnaucas vischinontas da Medel, Mustér ed Ursera igl anniversari dad 800 onns baselgia s. Vigeli. A beinenqualin Tuatschin ha quella occurrenza insumma buca plaschiu, festivar a Mustér nosa fiasta dil s. Rusari, enzatgei nuncapeivel. La critica ei stada gronda ed ha fatg sterment a nus d'organisar quei di. Mo nus havein buca schau encuraschar ed havein dau tutta breigia d'organisar in bi di festiv. La messa en l'imposanta claustra ei stada grondiusa ed ils celebrants dil suvetsch divin han dau ina tut speciala tempra alla s. messa. Il cant, culs cantadurs dils chors da baselgia da Segnas, Mustér e da Sedrun, cun varga 100 umens ei staus impressiunonts. Suenter messa ha la pleiv da Tujetsch offeriu en halla plurivalenta in gentar communabel. Rodund 450 persunas han priu part a quella purschida. Las uniuns culturalas dallas vischnaucas han purschiu duront e suenter gentar in variont program. Ils affons han saviu sedivertir cun differents giugs en halla Acla da Fontauna. Igl ei stau pil ver in bi ed emperneivel di, era sche l'aura ei buca stada dil meglier. Cuntents e satisfatgs ed in bien ton pli levs havein nus terminau quella fiasta. Igl echo fetg positivs che nus responsabels dalla pleiv havein astgau prender encunter da differentas varts ha legrau nus. Ils bials resuns d'ina commemoraziun impressiunonta e fascinonta, d'ina excellenta organisaziun e da gronda lavur ha remunerau nus per tut nossas stentas per in bein reussir da quella festividat. Quellas simpaticas vuschs, quellas bialas brevs ein segns che nosa decisiun ei buca stada dil tut fallida.



## 10 - Concert da Nadal

Il 26 da december 2005 ha il chor baselgia da Sedrun ed il Cantus firmus envidau al concert da Nadal. Els ein sepurschi da dar quei concert pigl onn giubilar 800 onns baselgia s. Vigeli. Ina baselgia fullanada ha dau suatientscha agl invit ed ha tedlau il grondius concert. Cun fermes applaus ha igl auditori engraziaiu per las bialas producziuns. Silsunter ha la pleiv purschiu avon baselgia in aperitiv.

## 11 - Occurrenza finala da Silvester

Terminaziun digl onn giubilar. Daco buca prender la caschun e terminar igl onn giubilar da Silvester e da Daniev ei noss'idea stada. Allas 22.45 havein nus envidau tuts interessai ad ina devoziun speciala en baselgia parochiala. La baselgia ei strusch stada plena, denton in bien ton dapli persunans che quei che havein spitgau. Igl ei stau ina biala devoziun cun cant e gloria che ha legrau ils presents. Suenter devoziun ha ei dau puschegn da Daniev, cun carn secca, caschiel, vin cauld, punsch ed auter. In a l'auter ei vegniu giavischau in bien e legreivel niev onn.

## 12 - 800 Candeilas

Tgei vulan ins regalar als hosps envidai tier las fiastas da giubileum? Ei dat bia pusseivladads, mo anflar in regal che corrisponda alla festividad ei nuota aschi sempel. La finfinala havein nus schau crear ina candeila cun il motiv dalla baselgia giubilonta. L'uniun da dunnas ei sepurschida dad ornar las candeilas, aschia sco ellas fan mintgamai cun las candeilas da pastgas. En tut ha l'uniun ornau 800 candeilas, 100 grondas per regalar als hosps envidai, 200 mesaunas per schenghegiar a tut quels ch'ei segidai vid las occurrenzas e 500 candeilas per la vendita, ina regurdientscha dil giubileum dad 800 onns. In grond Dieus paghi all'uniun da dunnas per quella biala purschida.





### **13 - Plaid final**

Cordialmein engraziel jeu a mes collegas da suprastonza per tutta buna lavur e pil cumplein engaschi. Vos essas s'engaschai cun tuttas forzas per in bein reussir dallas festivitads dad 800 onns baselgia s. Vigeli. Per quella prestaziun singulara meriteis Vos in grond compliment ed in profund Dieus paghi. Engraziament era a tut tgi ch'ei s'engaschaus cun plaid e cussegl, cun lavur e prestaziun tier las occurrenzas.

### **Il Segner ha dau - il Segner ha priu - siu num seigi benedius**

Il sacrament dil s. Batten han 15 affons retschert igl onn 2005, 11 affons ord nossa pleiv. Als affons e geniturs giavischein nus bia legria, plascher ed in bien prosperar en nossa cuminonza cristiana. 5 lètgs ein uonn vegnidas enzinnadas en nossa pleiv, ella val sesenta 1 lètg. Als spusai cordiala gratulaziun e tut mo bien en lur veta matrimoniala.

Igl aungel dalla mort ha era menau uonn da nos commembersa casa tier il Bab. En tut ha el accumpignau avon la fatscha da Diu 18 da nos commembers. Els ein ira ordavon a nus ed ein entrai el reginavel dils morts. Dieus il Signur sur veta e mort ha fatg grazia cun els e priu nos cars a casa en sia vegna. Ed in di vegnin nus a suandar els ed arrivar avon la fatscha da Diu, cun la ferma speronza da seveser cun nos cars da nossa cuminonza. Il Segner regali a nos defuncts il ruaua perpeten. Els ruaussien en la pasch da Christus.

### **Engraziament**

In onn ei puspei ius alla fin ed en num dalla suprastonza da pleiv lessel jeu prender la caschun d'engraziar a Vos, preziadas parochianas e parochians. A Vos che segideis e sustenis nus cun plaid e cussegl, lavur e quitau, in cauld engraziament. Ei fa adina bein dad udir e sentir ch'ins vegn purtai dalla cuminonza, pertgei lavur e fastedis enteifer nossas scheinas dat ei detg avunda. Nus sespruein d'ademplier l'incumbensa surdada e sliugar ils problems aschi bein sco pusseivel. Cun Vies sustegn e cun agid da Diu il Suprem continuein nus cun igl affar da nossa pleiv.

In resentiu engraziament admettein nus a nos plevons per tut lur lavur e quitau per nossa cuminonza. La lavur ei gronda e vegn repartida sin paucas schuialas, aschia ch'ina u l'autra caussa sa buca vegnir exequida pli. Al parsura da nos spirituals, sur Alexi Manetsch, schai in grond buordi da responsabladad e quitau e che drova bia forza ed engaschi. Ad el admettein nus in grond Dieus paghi per tut il prestau en nossa Val. Engraziel fetg sch'ei nus era a ses gidonters sur Ozioma Nwachukwu e sur Benny Varghese sco era a sur Albert Wangler p.m. per tut lur buna lavur. Bien engraziament als spirituals digl asil s. Vigeli, sur Placi Huonder, sur Christian Monn e sur Tumaisch

Berther ed als spirituals gidonters per lur buns survetschs. Cun agid da Diu annunzian els a nus - la naschientscha- la mort - e la levada da Niessegner Jesus Christus.

In cordial Dieus paghi admettein nus plinavon:

Alla grupp liturgica, als responsabels dalla ductrina, allas dunnas per il salid al Segner, allas calustras e calusters cun lur gidonters, als ugai da baselgias e capluttas, als organists, al secretariat, al cussegl pastoral, allas differentas uniuns, als ministrants, alla cumissiun restauraziun baselgia s. Vigeli, als commembers e revisurs dalla suprastonza da pleiv, allas autoritads communalas, ed a Vus tuts che segideis e sengascheis per il beinstar da nossa cuminonza. Vegli Dieus il Signur sur veta e mort regalar a Vus tuts la pagaglia.

Cun la ferma speranza, che Dieus nies Salvader e Spindrader accumpogni nus sin nossa via salidein nus Vus

Per la suprastonza dalla pleiv da Tujetsch

Il president  
Tadeus Giossi

# Rapport annual dil cussegl pastoral 2005

Il cussegl pastoral duei esser in ligiom denter pleiv - plevon - e pievel. Gia ei in onn puspei vargaus ed ei s'auda al cussegl pastoral da dar rapport dil curriu e passau duront igl onn ora.

## S. Retgs

All'entschatta digl onn han ils s. Retgs fatg l'usitada viseta en casas e famiglias. Ils affons fan quei cun plascher e sut la bitgetta dil scolast Ciril han els cantau la canzun dils s. Retgs. Scolars e scolast meretan in grond engraziament per igl engaschi. Era a la gruppa che prepara ils retgs e reginas e che transportescha ils affons els vitgs ed uclauns in grond Dieus paghi.

## Di da suppa

La s. messa per quella dumengia ha sur Ozioma festivau ensemen cun la 4. classa dalla catacheta Letizia Berther. Alla fin dalla messa han Sur Ozioma e ser Just presentau dias sur dil project MBara-Ozioma. Stau fetg interessant; l'unfrenda per il di da suppa va en favur da quei project. La suppa da cureisma ha nies premurau Nazi Schmid da Dieni offeriu gratuitamein. Ina biala gesta ed el mereta in sincer Dieus paghi.

## Bambinas

Per la fiasta dalla emprema s. communium astgan las bambinas cumpignar ils prem-comunicants. Quei ei aunc oz in eveniment special, pertgei la sort decida tgi che astga purtar il Bambin. Dapi generaziuns regia quella tensiun.

## Fiasta da Sontgilcrest

Per quella fiasta havein preparau il plaz avon la Casa s. Vigeli. Ils spirituals sur Benny e sur Ozioma han celebrau la s. messa. Il chor baselgia ha embelliu la fiasta cun ina biala messa. A plevons e chor in cordial engraziament. Ils cussadents dalla casa s. Vigeli e nus auters cartents essan stai fetg engrazievels per quella biala messa cun priedi e cant.

## Sur Albert Wangler (cumiau)

Cun la fin mars ha sur Albert Wangler giu finiu siu uffeci sco plevon. Il davos zercladur havein survegniu la tresta nova da sia mort prematura. Bia buns patratgs ha el purtau en nossa cuminonza cristiana; mo era provocau e mess en damonda nossa tenuta da cardientscha. Possi el ruassar en pasch.

## **Aperitivs**

Adina puspei essan nus dil cussegl pastoral segidai tier las differentas occasiuns dalla fiasta da 800 onns baselgia s. Vigeli; en favur dalla suprastonza da pleiv.

## **Eleziuns**

Cun la finiziun dil temps d'uffeci dalla suprastonza dil cussegl pastoral e demissiuns ha ei era dau enqual midada enteifer il cussegl. Demissiunau han: Rebecca Loretz, Claudia Berther, Daniela Cavegn. Persuenter havein anflau novs commembers: Arthur Caduff, Arthur Cavegn, Maria Barla Riedi. Els ein vegni elegi dalla radunonza generala dalla pleiv. Cun tutta curascha essan semess sin via per encurir ina nova suprastonza. Unanimamein ein vegni elegi per il presidi Ursula Deplazes cun sustegn da Marcus Munsch che figurescha era sco actuar. Sco cassiera vegn elegida Barla Agatha Cavegn.

## **Survetsch preeucaristic**

Havein puspei mess en pei il survetsch preeucaristic entras las duas mummas Alice Andreoli e Nicola Decurtins. In compliment ed engraziament ad ellas per lur survetsch.

## **Dumengia d'engraziament per la raccolta**

Per quei di havein envidau in e scadin da purtar lur raccolta en baselgia. Nus havein segidau da vender ils fretgs dalla tiara ed il recav havein surdau a sur Ozioma per in project en Nigeria.

## **Adoraziun**

Quei di ei dedicaus a Christus Retg. Sur Alexi ha exponiu il Sontgissim sigl altar. Havein envidau in e scadin da far ina viseta en la tgeua baselgia cun musica meditativa; d'envidar ina candeila; da presentar nos giavischs mo era metter nos quitaus els mauns da Diu. Quella purschida carmala bia parochians ed era bia famiglias da s'entupar senza biars plaids. Il resultat muossan las biaras candeilas che ardan sin ils pass alla fin dall'exposiziun dil Sontgissim.

## **Sontgaclau**

In compliment alla giuventetgna da Tujetsch che ha manteniu il bi usit da Sontgaclau. Cun bia entusiassem e bunaveglia s'engascha la giuventetgna per il reussir da quella sera. La disciplina che regia denter sogns e fumegls ei (bunamein) exemplarica. In grond engraziament alla suprastonza da giuventetgna, als giuvenils, als sogns per tut igl engaschi ed a sur Alexi per il survetsch divin.

## **Sentupada da giuventetgna**

Il december, cuort avon Nadal ha sur Ozioma preparau ina sentupada per la giuventetgna Milez - Dieni - Sedrun cun tizzuns. Nus dil cussegl pastoral havein preparau la baselgia cun candeilas, fatg fiug avon baselgia, pinau in bien punsch e paun cun pera; denton tut ei dau ell'aua ni meglier detg ella cufla. Donn: pouca motivaziun dalla giuventetgna.

## **S. Silvester**

Da s. Silvester allas 23.00 uras havein serrau giu igl onn da giubileum «800 onns baselgia s. Vigeli» cun in concert ed ina meditaziun (silsuenter ha ei dau in aperitiv). Ina cuntinuaziun ei giavischada.

In onn cun dabia activitads ei ius a fin. A mi s'auda ei d'engraziar als commembers dil cussegl pastoral cun lur confamigliars, als ministrants cun lur menadra Margrith, als lecturs, alla gruppa liturgica, als chors da sepultura cun dirigents ed organist, ed insumma a mintgin che segida per il beinstar da nossa pleiv.

Sedrun, avrel 2006

Per il cussegl pastoral

Ursula Deplazes

## Bilanza per ils 31-12-2005

### Activas

#### Facultad currenta

Conto banca Cantunala	355.40
Conto banca Raiffeisen	18'278.00
Vaglias	650.00
Debiturs	10'202.30
Dabien taglia da cult	241'948.80
Dabien taglia anticipada	60.60
Activas transitoricas	0.00

#### Facultad plazzada

Casa pervenda Sedrun	265'000.00
Casa pervenda veglia Sedrun	162'000.00
Casa pervenda Rueras	134'000.00
Casa pervenda Selva	167'000.00
Baghetg Selva	35'000.00
Faner Rueras	7'400.00
Prau agricol	20'000.00

### Passivas

#### Capital jester

Crediturs	8'519.85
Crediturs «taglia fontauna»	8'886.60
Deivet hipotecar	120'000.00
Passivas transitoricas	5'000.00

#### Agen capital e reservas

Agen capital	914'616.45
Reserva manten.baghetgs e baselgias	0.00

**Gudogn / sperdita digl onn** 4'872.20

**Total** 1'061'895.10 1'061'895.10

7188 Sedrun, ils 15 d'avrel 2006 sc

Il cassier: Cavegn Simeon

# Quen da cult pigl onn 2005

## Expensas

### Cuosts da personal/instanzas

Pagas	145'870.70
Pagas e cuosts suprastonza	26'940.30
Pagas augsegners gidonters	842.00
Pastoraziun da giuventetgna CADI	7'185.00
Cuors da perfecziun	3'300.00
Cussegl pastoral / Agid pastoraziun	1'623.55
Cassa da cumpensaziun AVS	14'923.90
Cassa da pensiun	13'417.35
Cassa da malsauns ed accidents	1'219.80
Ulteriurs cuosts d personal	4'106.40

### Cuosts immobilias ed indrezs

Manteniment casas	10'663.30
Manteniment baghetgs	0.00
Manteniment indrezs	2'122.15
Manteniment e cuosts dad orglas	3'458.90
Manteniment baselgias e lavurs da contuorn	15'809.95
Ieli, electricitad, aua	5'703.75
Serenera, canalisaziun e miardas	1'845.40

### Cuosts generals

Tscheins e cuosts da banca	3'852.85
Taglias	5'892.00
Segiradas	2'466.45
Spesas d'auto, tel. plevons	857.40
Contribuziuns	158'748.00
Festivitad «800 onns s. Vigeli»	18'144.95
Incasso taglia	8'159.30
Uorden per dar ductrina	3'368.20
Stampats/publicaziuns/inserats	5'481.65
Cuosts da biro/EDV/portis	2'223.60
Spesas suprastonza/consummaziuns radunonzas	891.20
Ulteriurs cuosts generals	3'507.85
Deducziuns	13'700.00

**Total expensas** **486'325.90**

## **Entradas**

### **Taglias**

Taglia da cult	276'141.15
Taglia alla fontauna	129'367.85

### **Tscheins**

Tscheins casa	35'350.00
Tscheins activs	103.50
Tscheins da praus e terren	5'049.00
Parcadis/plazza da sport	29'879.00
Tschaler da schurmetg	3'656.00

### **Contribuziuns**

Contribuziuns caluster	1'500.00
Contribuziuns ductrina	6'000.00
Bunamanas Sogntget Gedijs	0.00
Diversas intradas	4'151.60

**Total entradas** **491'198.10**

### **Cumparegliazion:**

<b>Total expensas/entradas</b>	<b>486'325.90</b>	<b>491'198.10</b>
<b>Fatg anavoŝ n</b>	<b>4'872.20</b>	
<b>Total</b>	<b>491'198.10</b>	<b>491'198.10</b>



## Quen annual Pleiv Tujetsch

1. Entradas	Quen 2005	Preventiv 2006
<b>A) Taglias</b>		
- Taglia da cult	276'141.15	250'000.00
- Taglia alla fontauna	129'367.85	120'000.00
<b>B) Tscheins</b>		
- Tscheins casa	35'350.00	30'000.00
- Tscheins activs	103.50	200.00
- Tscheins da praus e teren	5'049.00	5'000.00
- Parcadis / Piazza da sport	29'879.00	20'000.00
- Tschalèr da schurmetg	3'656.00	3'500.00
<b>C) Contribuziuns</b>		
- Contribuziun caluster	1'500.00	1'500.00
- Contribuziun ductrina	6'000.00	6'000.00
- Bunamanas sontget Gedijs	0.00	0.00
- Diversas intradas	4'151.60	0.00
<b>Total entradas</b>	<b>491'198.10</b>	<b>436'200.00</b>
<b>2. Expensas</b>		
<b>A) Cuosts da personal</b>		
- Pagas	145'870.70	150'000.00
- Pagas e cuosts suprastonza	26'940.30	28'000.00
- Pagas augsegners gidonters	842.00	4'000.00
- Pastoraziun da giuventetgna CADI	7'185.00	7'200.00
- Cuors da perfecziun	3'300.00	3'000.00
- Cussegl pastoral	1'500.00	2'000.00
- Agid vid la pastoraziun	123.55	1'000.00
- Cassa da cumpensaziun AVS	14'923.90	15'000.00
- Cassa da pensiun	13'417.35	10'000.00
- Cassa da malsauns ed accidents	1'219.80	1'500.00
- Ulteriurs cuosts da personal	4'106.40	6'000.00

**B) Cuosts immobilias ed indrez**

- Manteniment casas	10'663.30	10'000.00
- Manteniment baghetgs	0.00	2'000.00
- Manteniment indrezs	2'122.15	2'000.00
- Manteniment e cuosts dad orglas	3'458.90	10'000.00
- Manteniment baselgias	14'449.95	5'000.00
- Lavurs da conturon	1'360.00	2'000.00
- Ieli/electricidad/aua	5'703.75	6'000.00
- Serenera/canalisaziun/miardas	1'845.40	4'000.00

**C) Cuosts generals**

- Tscheins e spesas da banca	3'852.85	3'800.00
- Taglias / taxas	5'892.00	6'000.00
- Segiradas	2'466.45	2'600.00
- Spesas auto/tel. a plevons	857.40	3'500.00
- Contribuziuns	158'748.00	80'000.00
- Ulivaziun sperditas	0.00	30'000.00
- Festivitat 800 onns s.Vigeli	18'144.95	0.00
- Incasso taglia	8'159.30	9'000.00
- Uorden per dar ducrina	3'368.20	6'000.00
- Stampats / inserats	5'481.65	6'000.00
- Material da biro, eed, porti ect.	2'223.60	3'000.00
- Spesas supr./consumm.radunonzas	891.20	1'500.00
- Ulterius cuosts generals	3'507.85	6'000.00
- Deducziuns	13'700.00	14'000.00

**Total expensas** **486'325.90** **440'100.00**

**3. Cumparegliaziun**

Total entradas	491'198.10	436'200.00
Total expensas	486'325.90	440'100.00

**Fatg anavon / anavos** **4'872.20** **-3'900.00**

7188 Sedrun, ils 15 d'avrel 2006 sc

PLEIV CATOLICA TUJETSCH  
Il cassier: Cavegn Simeon

## Revista dil quen 2005 dalla baselgia s. Vigeli

### Entradas

Unfrendas	8'695.35
Bunamanas/Legats	5'000.00
Tscheins bruts	880.15
Contribuziun pleiv	5'000.00
Restituziun messas fundadas	3'000.00
Renovaziun s. Vigeli	448'572.85
<b>Total entradas</b>	<b>471'148.35</b>

### Expensas

Segiradas/taxas	4'029.60
Energia	8'265.30
Stipendis messas fundadas	4'390.00
Embelliments/candeilas	792.05
Vins da messas/hostias	1'502.50
Manteniments	363.35
Tscheins/spesas banca	28.75
Renovaziun s. Vigeli	898'547.70
<b>Total expensas</b>	<b>917'919.25</b>
<b>Surpli expensas</b>	<b>446'770.90</b>

Il cashier:  
Simeon Cavegn

## Revista dil quen dalla baselgia s. Giachen

### Entradas

Unfrendas ordinarias	9'914.25
Glischettas	4'148.55
Bunamanas/legats	5'000.00
Restituziun messas fundadas	1'500.00
Tscheins bruts	285.80
Contribuziun pleiv	12'000.00
<b>Total entradas</b>	<b>32'848.60</b>

### Expensas

Segiradas/taxas	2'043.75
Energia	5'045.05
Stipendis messas fundadas	1'770.00
Candeilas/Embelliments	307.55
Vins da messa/hostias	485.00
Manteniments	132.50
Tscheins/spesas banca	945.85
<b>Total expensas</b>	<b>10'729.70</b>
<b>Surpli expensas</b>	<b>22'118.90</b>

Il cassier:  
Simeon Cavegn

## Facultad baselgias e capluttas

<b>Sedrun: Baselgia s.Vigeli</b>	Facultad	20'042.30
Ugau e caluster:	Deivet	342'084.00
Deplazes Ursula	Fondo messas fundadas	196'960.00
<b>Rueras: Baselgia s.Giachen</b>	Facultad	4'257.65
Ugau e caluster:	Deivet bancar	26'000.00
Monn Imelda	Deivet fondo messas fund.	75'700.00
	Fondo messas fundadas	110'810.00
<b>Selva: Baselgia s.Gion e Paul</b>	Facultad	55'069.00
Ugau e caluster:	Fondo messas fundadas	28'250.00
Monn Flurin		
<b>Tschamut: Caplutta s. Clau</b>	Facultad	4'527.00
Ugau: Berther-Kuster Franziska		
<i>Veronica Giossi - Niclsen</i>		
<b>Giuv: Caplutta s. Bistgaun</b>	Facultad	18'910.44
Ugau: Monn Gion Giachen		
<b>s. Brida: Caplutta s. Brida</b>	Facultad	17'244.80
Ugau: Monn Flurin		
<b>Zarcuns: Caplutta Nossadunna</b>	Facultad	14'081.00
Ugau: Schmid-Manetsch Vigeli		
<b>Camischolas: Caplutta s.Onna</b>	Facultad	1'373.00
Ugau: Cavegn Venanzi	Deivet	10'000.00
<b>Bugnei: Caplutta s. Giusep</b>	Facultad	45'527.00
Ugau: Solèr Ambrosi		
<b>Cavorgia: s. Leci</b>	Facultad	5'271.00
Ugau: Hendry Ursulina		
<b>Surrein: s. Antoni</b>	Facultad	37'422.00
Ugau: Loretz Jovita		
Il cassier:		
Cavegn Simeon		

## Rapport dils revisurs da quen

Per la radunonza dalla Pleiv da Tujetsch

Stimada suprastonza

Stimadas commembras, stimai commembers dalla Pleiv da Tujetsch

La revisiun dil quen 2005 ei vegnida fatga entras ils 2 revisurs en preschientscha dil cassier ils 18 da fevrer 2006. Tier nossa controlla havein nus inspectau il quen e la bilanza sco era ils quens dallas baselgias e capluttas.


Sco usitau ei il quen menaus schuber e bein conform alla contabilitad moderna. Tut ils mussaments ein avon maun e corrispundan allas cudischaziuns. Tier tut nossas damondas ha il cassier saviu dar sclariment.

Sin fundament da nossa controlla proponin nus alla radunonza generala:


- a) *dad approbar il quen e la bilanza digl onn 2005 dalla Pleiv da Tujetsch*
- b) *da dar scarisa al cassier e tuts funcziunaris dalla suprastonza*
- c) *dad admetter al cassier Simeon Cavegn in cordial «Dieus paghi» per siu grond engaschi.*

Rueras, ils 28 da mars 2006

Ils revisurs:



Linus Vincenz



Hubert Venzin

## Officials dalla Pleiv Tujetsch

### Suprastonza dalla pleiv

president

vicepresidenta

actuara

cassier

Giossi Tadeus, Rueras

Cavegn Ursulina, Camischolas

Hitz-Schmid Rita, Rueras

Cavegn Simeon, Sedrun

Monn Ignazi, Sedrun

sur Manetsch Alexi, Sedrun (ex off.)

sur Nwachukwu Ozioma, Sedrun (ex off.)

sur Benny Varghese (ex.off.)

sur Albert Wangler, Sedrun (ex off.)

(entochen ils 31-03-05)

### Post da contact

Cavegn-Flury Margrith

### Revisurs da quen

suppleants

Vincenz Linus, Rueras

Venzin Hubert, Rueras

Berther Victoria, Gionda

Venzin Mudest, Rueras

### Ugaus baselgias e capluttas

Tschamut

Selva

S.Brida

Giuv

Rueras

Zarcuns

Camischolas

Sedrun

Sontget dils gedius

Bugnei

Surrein

Cavorgia

Giossi Veronica, Sedrun

Monn Flurin, Selva

Monn Flurin, Selva

Monn Gion Giachen, Rueras

Monn Imelda, Rueras

Schmid Vigeli, Zarcuns

Cavegn Venanzi, Camischolas

Deplazes Ursula, Sedrun

Deragisch Valentin, Sedrun

Solèr Ambrosi, Bugnei

Loretz Jovita, Surrein

Hendry Ursulina, Cavorgia

### Organists/as

Berther-Berther Rita, Rueras

Pally-Brugger Vinzens, Rueras

Schmid-Bläsi Fabiola, Cuera

Steinacher Erica, Turitg/Mustér

**Dirigents dils chors**

baselgia Sedrun

baselgia Rueras

Hendry Benedetg, Sedrun

Hendry Tarcisi, Sedrun

**Calustra Sedrun**

Deplazes Ursula, Sedrun

**Calustra Rueras**

Monn-Monn Imelda, Rueras

**Caluster Selva**

Monn-Wyss Flurin, Selva

**Cussegl pastoral:**

presidenta

actuar

cassiera

Deplazes-Monn Ursula, Sedrun

Munsch-Vincenz Marcus, Sedrun

Cavegn Barla Agatha, Rueras

Caduff-Deplazes Arthur, Sedrun

Cavegn-Curschellas Arthur, Rueras

Cavegn-Bisquolm Ursulina, Camischolas

Hendry Rafaela, Gionda

Monn-Monn Imelda, Rueras

Riedi-Berther Maria-Barla, Gionda

ex. officio:

sur Manetsch Alexi

sur Nwachukwu Ozioma

sur Varghese Benny

sur Wangler Albert (31-03-05)

**Ductrina**

Berther-Loretz Letizia, Camischolas

Cavegn-Bisquolm Ursulina, Camischolas

Curschellas-Berther Anna, Sedrun (31-08-05)

Flury-Tanner Yvonne, Camischolas (31-08-05)

Venzin Hubert, Rueras

**Parter ora la s.communiun,  
lecturs/as, survetsch preeu-  
caristic e gruppa liturgica**

Andreoli-Schmid Alice, Gionda

Berther-Sommer Bruno, Reuras

Berther-Decurtins Tumaisch, Gionda

Berther-Tuor Barla, Rueras

Cathomen-Giossi Nicolina, Rueras

Cavegn-Flury Margrith, Sedrun

Cavegn-Fry Barla, Rueras

Cavegn-Berther Franzisca, Sedrun

Cavegn-Giger Nesa, Sedrun



Decurtins-Jägler Nicole, Sedrun  
Deplazes-Monn Ursula, Sedrun  
Estermann-Schmid Ervina, Gionda  
Giossi-Maissen Veronica, Dentervitgs  
Hendry Rafaela, Gionda  
Monn-Monn Imelda, Rueras  
Monn-Jacommet Marianna, Sedrun  
Monn-Jacommet Sep Andriu, Sedrun  
Munsch-Vincenz Marcus, Sedrun  
Schmid-Manetsch Vigeli, Zarcuns  
Soliva-Flepp Marcel, Sedrun  
Venzin Hubert, Rueras  
Vinzens Patrizia, Sedrun

**Sminca s. retgs**

Monn-Schlosser Astrid, Camischolas  
Venzin Hubert, Rueras